

Date - 12/10/2025 Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram Synod hnuai Inkhawmpui lian ber dawttu Presbytery Inkhawmpui chu hman mek a ni a, vawiin chawhma inkhawm hi Upa Nemngheh Inkhawm a ni ang.
2. India ram pum huap hockey inelna All India Inter SAI (Man & Women) Tournament khelh zawh takah Mizorama inbengbel STC Thenzawl te an champion.
3. Kumin January thla atanga September thla inkar khan Mizoram chuan ruahtui a dawng tha a, district hrang hrang zingah Kolasib chuan ruahtui hi dawng tha berin Mizoram pumah nikum aiin kuminah ruahtui a tam zawk.
4. Prime Minister Narendra Modi chuan scheme thar-PM Dhan Dhaanya Krishi Yojana leh Mission for Aatmanirbharta in Pulses te hian ram chhunga loneitu maktaduai tam takte hausakna a thlen dawn a ni, a ti.

<><><>

PRESBYTERY

Mizoram Synod hnuai Inkhawmpui lian ber dawttu Presbytery Inkhawmpui chu hman mek a ni a, vawiin chawhma inkhawm hi Upa Nemngheh Inkhawm a ni ang.

Inkhawmpui hi October ni 9 atang khan Mizoram chhung leh pawn hmun hrang hrangah neih a ni a, Nomination Committee, Finance Committee leh Sub-Pastoral Committee an thu tawh a, Kohhran Upa thlan tharte Exam buatsaih niin Palai lawmna leh Pastor Bial Report ngaihthlak a ni tawh bawk a, Kohhran Zaipawl te an zai thin bawk.

(SFX)

Nimin leh Zirtawpni khan Rorel Inkhawm neih a ni a, Presbytery thenkhat chu Inrinni chauha Rorel an awm bawk. Nizan khan vantlang Pathian biak Inkhawm neih niin, vawiin chawhnuah Lalpa Zanriah Sakramen leh Upa thite sunna inkhawm a awm ang a, zanah Presbytery Moderator kalchhuakten Valedictory Sermon an sawi ang.

Presbytery Inkhawmpui hmanpui turin Synod Puipate chu hmun hrang hrangah an feh chhuak a ni.

Mizoram Synod Website tarlan danin, Mizoram Presbyterian Church Synod (2023 - 2024) hnuaiah hian Presbytery 47 awmin Pastor bial 298 a awm mek a, kohhran member nuai 6 sing 2 leh 7,719 an awm mek a ni.

<><><>

CHAMPHAI

Nimin khan Champhai Police leh Champhai Sub-Hqrs. MHIP tangkawp te chuan, Chalbawiha Junction, Champhai Police check gate-ah Gutkha Product - Shikhar leh SS One thahnem tak an man.

Heng an thil mante hi Champhai Police Station-ah Addl. SP hovin an halral. Heng Gutkha product, Shikhar leh a behbawm te hi local market rate a chhutin cheng nuaih khat lai man a ni a, heng Gutkha thilte hi Champhai khawpui chhung leh a chheh vela hralhchhuah tura Aizawl atanga sumdawngten an rawn phurh luh a ni.

<><><>

HOCKEY

India ram pum huap hockey inelna All India Inter SAI (Man & Women) Tournament khelh zawh takah Mizorama inbengbel STC Thenzawl te an champion.

Inelna hi Ocotober ni 6 atanga ni 11 chhung khan SAI NSSC Bangalore-ah neih niin, STC Thenzawl a inzirlai tleirawlte te hian final-ah STC Sundargarh chu goal thum goal khata hnehin an chungnung ber a ni.

Final-ah hian Vanlalpeki chu player of the match atan thlan a ni a, player of the tournament atan Laldinpuii chu thlan a ni bawk. STC Thenzawlah hian Mizoram hmun hrang hrang atanga hmeichhe hockey khel thiam, hmabak nei eng tak tak te an inzir mek a ni.

Thenzawl Centre atang hian India aiawh a khel phak thahnem tak an lo inzir chhuak tawh a, an zingah hian Lalremsiami Hmar pawh a tel. Remsiami hi Olympian niin, tun dinhmunah India senior player pawimawh a ni mek bawk a ni.

<><><>

WEATHER FORECAST

Kumin January thla atanga September thla inkar khan Mizoram chuan ruahtui a dawng tha a, district hrang hrang zingah Kolasib chuan ruahtui hi dawng tha berin Mizoram pumah nikum aiin kuminah ruahtui a tam zawk.

Akashvani Aizawl zawhna chhangin Indian Meterological Department, Aizawl Director Pu Sudheer Kumar Dwivedi chuan, Kolasib dawtah hian Aizawl leh Siaha district te chuan ruah tui an dawng tha niin a sawi a, nikum aiin ruahtui an dawng tha zawk a ni. Khaw awm dan thlir chuan tun thla October leh November thla lai hawl thleng hian ruahtui a la tlak belh nual turah an ngai bawk.

IMD Aizawl Director sawi danin District tinah nikum aiin ruahtui an dawng tha zawk vek a. Hetihlai hian ruahtui avang hian lei min leh chhياتna dang pawh a thlen phah ve thin bawk a ni.

Pu Sudheer Kumar Dwivedi chuan ruahtui tlak chungchang leh khaw chin mipui hnena puan chhuah chungchangah All India Radio chuan mawhphurhna

pawimawh tak a la nia sawiin, mipui himna leh thu pawimawh tak tak hriattirtu a ni tih a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BANA KAIH

Mizoram sorkar flagship programme, Bana Kaih (Handholding) Scheme Phase-I hnuuia loan component diltu zinga progress partner atana thlan mi 200 hnenah bank-ten loan an pe tawh a, mi 200 hnenah loan pek tawh hi a vaiin cheng vbc 14.39 a tling.

Handholding Scheme Phase-I ah hian loan component dilna 11,439 zinga 702 pawm niin, progress partner atan thlan an ni a; kar kalta October ni 10, Zirtawpni thleng khan he'ng mi 702 zinga mi 200 hnenah hian Handholding Scheme partner bank - Mizoram Rural Bank, Mizoram Cooperative Apex Bank leh State Bank of India-ten loan cheng vbc 14, nuai 39, sing 7 leh 600 an pe tawh.

Handholding Scheme partner bank pathum zinga loan pe tam ber Mizoram Rural Bank chuan mi 151 hnenah loan an pe tawh a; State Bank of India-in mi 40 leh Mizoram Cooperative Apex Bank-in mi 9 hnenah an pe tawh a ni.

Mizoram State Policy Coordination Committee (MSPCC) hotute hnen atanga Akashvani thudawn danin, thlahlui September ni 19-a tlangzarh Handholding Scheme Phase-II kalpui mekah ni 22 chhung, kar kaltla Ningani thleng khan progress partner dilna 20,050 a lut tawh.

Ni 22 chhunga Handholding Scheme Phase-II atana progress partner dilna hi loan component-ah 109 leh CM Special Package-ah 19,941 a ni a; MSPCC hotute chuan phase-II a dilna lut zingah pawm an la neih rih loh thu sawiin, dilna lutte hi an endik chhoh mek thu an sawi a ni.

<><><>

PM-DDKY

Prime Minister Narendra Modi chuan scheme thar-PM Dhan Dhaanya Krishi Yojana leh Mission for Aatmanirbharta in Pulses te hian ram chhunga loneitu maktaduai tam takte hausakna a thlen dawn a ni, a ti. Heng scheme te hi mahni inrintawkna, thingtlang hmasawn nan, leh agriculture lama hmasawinna thar thlenna tura ruahman a nih thu a sawi bawk. Ram chhunga agriculture system-a hmasawinna chak tak leh siamthat a tul thu a sawi bawk. Prime Minister hian New Delhi-a cheng nuai 42 chuang hu project leh scheme hrang hrang hawn leh lungphum a phum hnuah thu a sawi a ni.

Agriculture and Farmers' Welfare Minister Shivraj Singh Chouhan pawhin thu a sawi bawk a, GST thar chuan sorkarin lo neihna hmanruaa GST rate tihhnam hmangin loneitute tan chhawmdawlna a pe a ni, a ti a. Prime Minister chuan loneitute chu a ngaih pawimawh ber a ni, a ti.

Fisheries, Animal Husbandry and Dairying Minister Rajiv Ranjan Singh chu biakhmuhtheihna kaltlang-in a tel ve a, PM Dhan Dhaanya Krishi Yojana chuan loneitute hmakhua a ti danglam dawn a ni a ti ve bawk.

<><><>

Mass Shooting

USA-a Mississippi-ah silai pawngkah vangin mi 4 an thi a, mi 12-in hliam an tuar. Leland a mipui punkhawmna hmunah a thleng a. Khawpui mayor John Lee chuan hliam tuar zinga pali chu thlawhna hmanga damdawi-in panpui an nih thu sawiin, tun thlengin rinhlelh an la awm lo tih sawiin, man an la ni loh thu a sawi.

<><><>